

四庫全書

史部

欽定四庫全書

史部

江南通志卷一百五十四

詳校官給事中_臣丁雲錦

檢討_臣德生覆勘

總校官編修_臣王燕緒

校對官助教_臣卜維吉

謄錄監生_臣袁榮

欽定四庫全書

江南通志卷一百五十四

人物志

忠節

二 鎮淮揚徐四府太海通三州

鎮江府

南北朝梁江革字休映濟陽人居京口舉南徐州秀才隨豫章王鎮彭城城失守被執魏刺史王延明聞革才名厚加接待革稱脚疾不拜令為碑文辭

不能將加箠扑革厲色曰今日得死為幸誓不為人執筆延明知不可屈放還後除光祿大夫卒謚彊子德藻仕陳為御史中丞

唐桓彥範字士則丹陽人門蔭授官狄仁傑見而器之累擢御史中丞與張柬之等謀誅張易之昌宗於廡下中宗復位以定策功封譙郡公韋后預政上表切諫不納用方士為秘書監國子祭酒執不可尋封扶陽郡王罷其政武三思矯制殺之睿宗

立復其官爵謚忠烈

宋洪造字彥襲丹陽人興祖弟登進士第授歙州黟縣尉方臘陷郡縣造使家人間道奉親以歸而身當其衝據險殺賊賊憤甚及城破首取造擊殺之事聞贈廕

張纘字彥智金壇人以父廕官至寶文閣學士金壇縣開國男建炎三年守揚州兵至朝廷恐纘力不能支許退保鎮江纘堅守不動城潰與妻子皆

死之

陳東字少陽丹陽人貢入太學欽宗即位率其徒
伏闕上書請斬蔡京梁師成李彥朱勔王黼童貫
六賊時李邦彥議和李綱主戰因小失利罷綱東
又上書言綱可任邦彥宜斥乃召綱高宗即位東
復請留綱而罷黃潛善汪伯彥又請帝親征以還
二聖俱不報會布衣歐陽澈亦上書言事潛善以
語激怒高宗遂收東東從容如平時手書區處家

事具衣冠出別同邸與澈同斬於市高宗後悔贈
祕閣修撰

茅湘字清淑丹徒人陸秀夫薦其才擢兵部侍郎
從秀夫負帝昺蹈海死元祠祀秀夫厓山獨以湘
配

高桂字德方丹徒人第進士歷官高郵知府後扈
從之海上進樞密使與陸秀夫同死於海

趙淮字元輔以從父葵賜第溧陽遂家焉德祐中

元兵大舉起淮為大府寺丞招集義兵倚岳山置寨與元兵戰敗被執不屈使往揚州招李庭芝降至則反大呼勵以死守元帥怒殺之罵不絕口二妾殉焉

元堵簡字無傲金壇人為浙江行省檢校官從平章強逼擊張士誠被執不屈遇害

明郭任丹徒人用薦入官廉慎有吏才仕至戶部侍郎靖難兵入抗義而死子經亦坐死時有丹陽人

賀純管軍百戶已老聞變被甲策馬厲聲迎詬被
害

張德字仲敬丹徒人建文元年以薦授都督府斷
事上治安五策時大臣建削弱諸王之策德疏言
宜制之以禮不可以細人告變輒動揺宗室又見
尚書齊泰言事皆曲突徙薪之計燕兵起德犒師
至東昌與北兵遇奮勇擊殺馬蹶被執燕王趣釋
之德瞋目攘臂言極激烈王怒劍斷其臂左右刃

交下至死不仆文皇即位誅逆黨德以陣死不入籍族得全

馬從謙字益之深陽人嘉靖乙未進士仕至光祿少卿時盛修道家齋醮中官杜泰怙勢乾沒從謙切諫並發泰姦泰因誣從謙誹謗廷杖死萬曆時子有譁以明經上書訟冤追贈太常寺少卿

張捷字前之丹陽人萬歷癸丑進士知山陰縣擢御史疏請內官當受考察於禮部司禮不得侵其

權如百官受考察於吏部閣輔不得侵其權之例
官終吏部左侍郎歲乙酉自經於雞鳴山寺提居
家孝友在官有清節以與東林相惡比匪人損名
然其死也士論咸予之

賀應選字繼登丹陽人天啟甲子舉於鄉授四川
資陽令張獻忠已躡全蜀應選嬰城固守城破闔
門十七人俱被害

荆本徹字瀛之丹陽人崇禎甲戌進士出溫體仁

門下有氣節與同年誓曰異日苟待罪言路宜別
邪正罔顧私恩體仁銜之授建昌推官所屬南豐
瀘溪令為相私人本徹發其陰事白巡按罷之體
仁益怒誣為浮躁免官後以職方郎中監下江軍
歿於浙東

荆偉字元升丹陽人對策高等授塾江縣繕城厲
兵為固守計山賊龔遂等數出剽掠設奇敗之會
獻賊窺蜀約遂為內應城陷不屈死

陳冊字用卿金壇人崇禎六年授四川寧番經歷署屏山縣事流寇破城罵賊死

沈元鑑字竟亭金壇人授隨州吏目張獻忠犯隨元鑑同知州防禦兩月援兵不至城陷賊衆脅降元鑑曰有死而已遂被害其子文淵赴難賊剽其手死而復甦負骸骨歸葬

王希高金壇人杜門讀書不交一人聞李自成陷京師即號泣出門其家蹤跡之不得明晨見希高

端坐居伍村池中就視之已死

馮厚敦字培卿金壇人明季壬午以貢授江陰訓導城陷坐明倫堂自縊死妻王氏與其姊結衽投水死時丹徒人潘文先為江陰訓導罷官與馮同死之

鄧藩錫字晉伯金壇人明季甲戌進士由知縣歷官知兗州府甫抵任城破死妾某氏亦攜子投井死

王明汲字孟用金壇人以舉人任贛州同知大兵
下南昌圍贛明汲與撫軍萬元吉固守八閱月城
破死之明汲之族有王明灝王榮圖諸生也王汝
紹布衣也皆死甲申之難丹陽諸生王介休亦聞
變不食七日死

徐有聲字聞復金壇人登鄉薦歷官至郎中督餉
大同城陷於流賊被執不屈死

陸明永字嵩年丹陽人為華亭教諭國變題詩明

倫堂自經死

國朝李琚字玉樹丹徒縣人順治乙酉武舉授福建興化左衛千總以勦山寇功擢福州閩安鎮水師守備丙申秋寇三十餘萬犯福州境琚連戰三日身被數十創遂歿於陣家口五十餘俱遇害

贈都司僉書

淮安府

漢臧洪字子源射陽人旻子舉孝廉太守張超請為

功曹勸起倡義兵誅董卓與諸牧守大會酸棗攝
衣升壇詞氣慷慨起遣與劉虞共謀為兵所阻寓
於袁紹紹以為東郡太守時曹操圍張超於雍丘
袁曹方睦洪請救不許超城遂陷因與紹絕紹圍
之歷年不下吏民感德莫有叛者及城陷紹生執
洪欲屈服之不從見殺

陳容射陽人隨臧洪為東郡丞先城未破洪使歸
袁紹洪被執時容在坐起謂紹曰將軍舉大事而

先誅忠義豈合天意紹慚遂使人牽出容顧紹曰
今日寧與臧洪同死不與將軍同生遂俱見殺在
坐者竊相嘆曰如何一日殺二烈士

五代張雄淮人周侵南唐楚州民間自相團結拒敵
謂之義軍雄所將最有功歷官袁州刺史及宋師
入江南金陵危急雄糾兵東下以救之至溧陽猝
遇宋師與其子七人皆力戰死

宋趙師旦山陽人以蔭起家皇祐中守康州儼智高

反攻城師旦力不敵或請避賊不聽血戰而死兵
官馬貴及卒三百人無一人降者贈光祿卿康州
人立廟以祀王安石誌其墓

劉晟山陽人以氣節名鄉里嘗與鄉薦紹興初權
本州錄司事通判劉晏殺太守晟諭以禍福時和
好初成晏謀劫歲幣以楚城反綱運已抵城南晟
策騎奔告綱運遂獲全晏知事洩執晟殺之闔門
遇害

繆朝宗淮人宋環衛官知海州從文天祥於平江
天祥歸福安自婺間道以從空坑之敗自經山間
朱立淮人三世為將從陳奕守黃州奕降元立潰
圍出江西制置使黃萬石署為帳前都統制元兵
畧江西萬石降立迎戰被執不屈萬石諭之立曰
立三世食趙氏祿趙亡何以生為竟遇害

張孝忠淮人德祐初元兵東下知信州謝枋得走
入安仁調孝忠逆戰圍湖坪矢盡揮雙刀擊殺百

餘人軍潰中流矢死

張德興淮人景炎二年與淮西野人原寨劉源等起兵興復司空山民傅高起兵應之遂復黃州壽昌軍戰於樊口殺元將鄭鼎未幾元襲破司空山復陷壽昌德興死之

黃文政淮人戍蜀軍潰間道走靜江馬暨邀與同守城被執大詬不屈元軍斷其舌文政含胡叱咄至死不絕聲

陸秀夫字君實鹽城人景定元年進士李廷芝鎮
淮南辟置幕中主管機宜文字累擢叅議官德祐
初以禮部侍郎使元軍請和不就益衛二王走溫
州秀夫追從之立端宗於福州進同僉樞密院事
端宗崩又立衛王秀夫為左丞相祥興二年厓山
破驅妻子先入海負王赴海死年四十四從死者
十餘萬人

明龔遂榮淮安人讀書好奇計嘗從討福建賊以功

授千戶景帝時議迎上皇遂榮投書大學士高穀
極言禮宜從厚帝怒索書急穀等諱之遂榮自縛
詣闕曰臣實為是書冀感動陛下耳下獄久之得
釋居貧授徒後復疏請還政上皇未上而世復下
獄杖幾死攀不行者數年

徐庠世襲大河衛指揮使正德七年與流賊戰於
鍾吾力鬪陣亡事聞陞級世襲

蕭鳳來世襲大河衛正千戶嘉靖三十八年領兵

屯廟灣禦倭力戰沒於陣又本衛百戶蘇臣亦陣亡

王弘安東人天啟初勦白蓮賊被執不屈釘於二樹之間罵不絕口而死

趙世選字韋所山陽人歲貢生崇禎八年授和州訓導抵任九月獻賊逼城世選與和州黎弘業學正康正諫分城誓守三日城陷罵賊不屈死事聞贈國子監學錄

潘弘字若稚山陽人以貢生授舞陽知縣崇禎十四年閩寇陷城弘作告先聖文誓必死賊索印脅降弘怒罵不屈賊支解之子澄瀾痛哭投井死贈
僉事

王伯度鹽城人以武科授崇明守備崇明濱海多賊伯度出搗賊巢被圍數重中流矢死弟伯聖以單騎潰重圍負兄屍出巡撫張國維特疏褒之

周文煒清河人由貢歷商州同知署知州事癸未

十月閏賊犯境文煒竭力守禦城陷被執罵不絕口為賊所磔子元生哭父詈賊亦被殺

李幹才鹽城廩生甲申聞李自成破京師即焚儒衣冠絕意不食同學諸人為詩文生祭之瞪目無一言而死

揚州府

漢劉瑜字季節廣陵人好經學延熹八年舉賢良方正上書陳事召問災咎之徵拜議郎竇武謀誅宦

官引為侍中武敗被殺子琬傳瑜學舉方正不就
蔣子文廣陵人漢末為秣陵尉逐盜至鍾山為盜
擊傷其額死後吳主追封為中都侯立廟祀之

三國華融字德純江都人好學善屬文吳郡張溫就
皇象學借止融家溫後為選部尚書擢融太子庶
子遂知名官侍中左將軍滕印勒兵拒孫綝使融
詐詔發兵融不從遇害

晉趙誘字元孫淮南人累葉將門積功賜爵平阿縣

侯代陶侃為武昌太守第五猗於荊州作亂誘拒之戰死子應王導引為從事中郎南頓王宗反應殺宗於是王導庾亮並倚仗之遷西豫州刺史卒唐來濟江都人護兒子篤志文章曉暢時務貞觀中擢進士永徽初同中書門下三品檢校吏部尚書嘗保護太子承乾又力沮以武氏為后武銜之貶台州刺史徙庭州總兵拒突厥謂其衆曰吾嘗絀刑網蒙赦不死今當以身塞責遂不介而馳沒焉

李璣字景望江都人鄜之孫登進士累遷戶部郎中分司東都黃巢陷洛璣挾尚書八印走河陽時留守劉允章為賊脅遣就璣索印拒不與允章悟亦不附賊入為翰林學士辭職歸乾寧元年召同中書門下平章事王行瑜韓建擁兵闕下殺之都亭驛行瑜誅詔贈司徒

宋沈攸字子宜揚州人建炎間賊邵青犯真州攸攝揚子簿以所練土兵禦敵北門死之

元樂鳳高郵人任諸暨知州方國珍叛執鳳不屈與妻王素英俱被害

趙璉字伯器儀徵人至治初進士累官江淮行省叅知政事張士誠降復叛襲璉於泰州璉力戰被執大罵死

明王鼎儀徵人為趙忠養子明初忠從渡江有戰功沒於陣鼎襲職復姓王守太平陳友諒以重兵來犯城陷鼎罵賊不屈死之

韓節揚州人建文時為工部郎中素懷耿忠嘗曰
論語事君以忠一語終身用之不盡臣子不察此
讀聖賢書所學何事時北兵日逼分守金川門城
陷巷戰敗績死

王烈泰州人世襲守禦正千戶嘉靖三十三年倭
寇通州巡撫鄭曉檄烈往援至黃茅港遇伏力戰
不勝死之加贈一級世襲指揮僉事

陳輔堯字九室江都人萬歷舉人授長寧知縣調

歸善擢膠州知州有饋山繭者受而懸之公帑中
遷永平同知赴瀋陽查馬事未竣遼潰左右曰公
無守土責盍去諸輔堯曰孰非封疆臣吾理芻馬
即吾之封疆也拔佩刀自刎贈按察僉事謚忠烈
古道行江都人明季辛未武進士以叅將守駱馬
湖庚辰寇至苦戰屢勝援兵不至歿於陣

郝景春字和蒲江都人萬歷壬子鄉舉授鹽城教
諭遷房縣知縣時賊張獻忠陽受撫尋叛率衆圍

房房兵少庾空賊碁布四境聲問不通遣使求援
者盡為賊獲景春同子鳴鸞督兵且守且戰五晝
夜賊多死欲解去而指揮張三錫縋賊登城城遂
陷擁景春去景春以手畫頸示其子曰此下不甚
痛父子決計死耳獻忠欲降之益大罵遂父子被
害贈太僕寺少卿建祠江都以鳴鸞祔

王道隆字堂生江都人天啟甲子舉於鄉除壽州
教諭陞濱州知州壬午冬城破道隆身被數創慷慨

慨不屈死家屬十餘口俱被難濱立祠表其忠

高孝鋹字仲達江都人以鄉舉任信陽知州流賊陷城逼降罵賊不屈死贈布政司叅政

楊廷璧字荆璞江都人以貢授舒城教諭賊張獻忠寇邑廷璧分守西門語縣令曰吾職非守土今日之事義不可辭萬一不守張許吾師也嚴守三晝夜矢石皆盡城陷被執罵賊遇害子濟之亦死倪可大字簡白儀徵人天啟中歲貢為霍丘訓導

明季丁丑流賊圍城督民兵拒守城陷可大嚙指
噴血罵不絕口遂被害妻女皆自縊僕倪表亦死
梁於渙字飲光江都人明季癸未進士知萬安縣
莅任甫一月城破死之

韓鼎新字煥然江都人以貢教諭浙江某縣城破
公服縊堂上

鄭為虹字天王江都人崇禎癸未進士除浦城知
縣擢御史巡仙霞關駐浦城時鄭芝龍盡撤守關

將仙霞嶺二百餘里間虛無一人

大清兵入閩為虹亟還浦城縱士民出走自守空城死之

王道淑字善長儀徵人由恩貢任湖廣按察司經歷廣州破死之其子械瑞從死

李信字吾斯興化人以歲貢授和平知縣城破與其二子泓遠淑遠俱死之

宋祥遠字元來江都諸生氣節自許工古文辭著

聽月山房集乙酉城破偕妻某撫其子曰有汝以
延先祀吾二人不敢偷生矣夫婦皆縊死

韓默字文適江都縣學諸生揚州城破時默謂妻
蕭氏曰吾讀聖人書當守義死不可苟活若自為
計易巾服墜井中妻蕭氏長子彥超俱從死同時
自盡者有指揮高一麟諸生汪應坤張映發劉慶
遠金颺呂家齊饒餘汪自盤王廷珮等

高孝纘字中伯揚州諸生城破書衣衿曰首陽志

唯陽氣不二其心古今一致自縊於學宮

王纘字伯綿 王績字亞綿 王績字叔綿

陳天拔

醫士

陸瑜

畫士

戴之藩

武生

張德

義兵

馮應昌

市民

以上皆揚州人城破自盡

國朝陳錡字鼎臣揚州人順治間武進士任荊州府副總兵領前鋒會勦山賊李來亨深入伏發從騎皆沒錡拔腰劍自剄

賜葬廕一子十總

劉欽隣字江屏儀徵人順治辛丑進士奉母不就

銓至康熙戊申始授富川知縣縣新定欽鄰百計撫綏甲寅孫延齡叛於桂林兵圍城城陷巷戰不勝被執送桂林以兵守之欲授以官欽鄰怒擲其印北面拜闕東向拜母自縊死事聞

贈光祿少卿諡忠節

董潐字禹門江都人恩貢以軍功授沙縣知縣順治四年有山賊羅某與妖僧米逢年共為亂環攻沙三月潐方并力禦東門而逢年誘縣丞黎某開

西門納賊潏被執罵賊甚厲賊怒叢射之割其頭去

贈按察司僉事

王相呂字望子泰州人以鄉舉授睢寧教諭順治九年叛賊海時行來寇城陷被執罵不絕口賊斫之握印而死子驊奪刀救父亦被賊斫死而復蘇事聞

贈國子助教

徐州府

漢周苛沛縣人為御史大夫高祖使守滎陽楚圍滎

陽急漢王遁去使苛守之楚破滎陽苛嫚罵不屈
項羽怒烹苛後論功封苛子為高景侯

周緤沛人以舍人從高帝起沛戰有利有不利終
無離上心封蒯成侯上欲自擊陳豨泣阻之以壽
終謚貞史遷稱其操心堅正篤厚君子

龔勝字君賓楚人哀帝徵為諫大夫數上書言百
姓貧盜賊多吏不良災異數見制度太奢刑罰太
深賦斂太重徙光祿大夫給侍中言董賢亂制逆

上指後為渤海太守王莽秉政乞骸莽既篡漢遣使者拜勝為講學祭酒稱疾不應後二年復遣使者奉璽書太子師友祭酒印綬安車駟馬迎勝勝稱病篤使者以印綬就加勝身輒推不受謂門人曰誼豈以一身事二姓哉遂不食十四日死年七十九

三國謝慈字孝宗彭城人撰喪服圖及變除論行世為孫奮傳以直諫見殺

晉劉邁字伯羣彭城沛人少有才幹為殷仲堪中兵
叅軍以言折桓玄避下都僅免後為竟陵太守從
弟毅與劉裕同謀起義邁將應之事世為玄所害
南北朝宋劉康祖彭城人父虔之為江夏相死於魯
宗之之難追贈梁秦二州刺史康祖膂力絕人每
犯法文帝以勲臣子原貸之後為叅軍被委任折
節自修元嘉中魏太武圍汝南康祖為前驅攻破
魏軍其年秋魏師復至衆寡不敵死之

劉勔字伯猷彭城人少有志節以功封金城縣五等侯殷琰據豫州以叛勔討降之約令三軍不得妄動城內士庶感悅立碑紀德後守尚書右僕射中領軍桂陽王休範難作死之謚曰忠昭

劉弘字仲遠彭城人魏太常芳之孫仕周為本郡太守隋高祖平陳之役從渡江以功封獲澤縣公拜泉州刺史會高智慧亂來攻州弘拒守百餘日救兵不至與士卒數百人煮犀甲腰帶剥樹皮食

之抗節彌厲城陷被害

孫道登彭城人魏永安初為梁將韋休等所獲脇使招降鄉曲道登乃厲聲倡呼但當努力賊無所能遂見屠戮朝廷遣官弔祭賜五等子爵

隋劉子翊彭城人大業間授侍書侍御史嘗從幸江都因侍切諫遣上江督運為賊吳恭子所掠欲要以為主不從會煬帝被弑羣賊執至臨川城下使以帝崩告城中子翊反其言遂見害

五代沈斌字安時下邳人仕晉為祁州刺史契丹犯境斌出擊不利敵將趙延壽招之降斌罵不屈城陷死之

劉仁贍字守惠彭城人仕南唐為清淮軍節度使鎮壽州周師攻之百端仁贍堅守四月不可下舍去明年復至唐君臣奉表願割地輸貢而仁贍堅守如故子崇諫幸其父病謀出降仁贍立命斬之士卒皆感泣願死守已病甚不知人其副使孫羽

以城降世宗命昇仁贍至帳前嗟嘆久之復使入城養疾是日卒

李筠豐縣人為周昭義軍節度使宋太祖即位遣使加筠中書令使者至洛州筠取周太祖畫像懸於壁涕泣不已北漢主聞之以蠟書約筠同舉兵宋遣石守信等分道擊之敗筠於長平筠走保澤州宋主列柵圍之入其城筠赴火死

宋趙立徐州人補都虞候建炎三年徐州陷知州王

復闔門百口死之立巷戰奪門出為敵所擊死夜半而蘇殺守者入城率殘兵邀擊之軍聲大振以復徐州功授忠翊郎權知州事楚州急立往援賴中矢不能言以手指麾既入城休士而後拔鏃劉豫兩遣使立立焚其書曰吾必滅豫而後已以漣水軍鎮撫使兼知楚州敵圍之急戰守百餘日忽飛砲碎其首左右馳救立曰吾終不能與國定亂矣言畢而卒詔立廟楚州謚忠烈

宋汝為字師禹豐人靖康元年北兵圍京師闔門
遇害汝為思報國家及父兄之讐建炎三年謁陳
遘事高宗嘉納假武功大夫奉國書使北行次壽
春遇完顏宗弼軍刼而縛之欲加慘汝為無懼色
惟請達書就死宗弼曰此忠義士也又持丞相書
往見劉豫開陳禍福勉使歸朝豫不聽誘以官固
辭越十年亡歸獻恢復方畧秦檜將械送汝為於
金乃變姓名亡入蜀能知死期祭其先終日大慟

將終神氣不亂子南強字子居亦徙紹興後知沙縣歷雅州咸著政績

魏勝字彥威宿遷人多智勇善騎射紹興末勝聚衆起義取漣水海州權知州事諭他縣皆定益圖收復與敵戰斬馘無算聞於朝授閣門祗候知海州隆興初改知楚州勝紀律如宿將鎮撫一方民安其政每戰標名於旗敵望旗而走或當危迫中輒呼曰魏勝在此敵皆辟易後扼清河口援救不

至死之贈保寧軍節度使謚忠壯

元石普字元周徐州人至正五年進士授國史院編修以將畧稱歷陞樞密院都事時張士誠據高郵普請兵往討之水陸並進乘勝拔十餘砦斬賊數百遂拔高郵縱火燒其關門賊懼謀棄城走總兵某者忌普功突出普軍前為賊所敗普軍亂力戰死之

韓準字公衡沛人年二十登進士授承事郎同知

孟州冬有蠲救民多蓄冰以防夏熱明年果然賴
冰愈疾者無算累陞河南僉事築堤陂田歲收粟
數千斛轉湖廣叅政斬黃寇起被圍五十四日竭
力捍禦城卒得全陳友諒破隆興欲致之不可饋
以糗不受授江西行省叅政城陷追準宣救準曰
此吾所受於君者並取吾首去卒藁葬福州

明謝昇徐州沛縣人與蘇州王玘友善以忠義相砥
建文時為監察御史練兵給餉甚著勞績靖難後

不屈死之父旺子皎謫戍金齒妻女俱謫發

湯克寬邳州衛人承世廕歷浙江叅軍陞副總兵
擊倭於溫州寧海蘇松間輒克之又為廣東總兵
破賊吳平後赴薊鎮炒蠻入掠追出塞遇伏戰死
朱用之睢寧人幼負勇畧正德六年流賊攻睢城
用之倡衆出戰軍敗被執賊愛其勇欲用為將不
從被殺又邳州衛百戶張輔驍勇過人與流賊戰
邳河南岸奮勇深入沒於陣

房永宿遷人前為六安衛指揮正德七年流賊猖獗聞永善騎射襲其家劫以為帥永諭以大義不從被害時同邑張廷美以選募與流賊戰邳州殺賊首數人後援不繼力鬪而沒

任巡蕭勇士嘉靖中倭寇淮揚巡應選至廟灣數戰皆勝單騎還遇別寇突至巡更還戰矢盡馬傷遇害事聞荷優卹

陳我謀蕭人幼習兵法天啟三年督帥王三善徵

從軍征黔首安邦彥累立奇功授電光營叅將大
方之役主帥陷重圍我謀麾騎馳援遂與俱沒貴
撫梁柄以事聞熹宗命廟祀黔土

歐陽復蕭人襲武功右衛指揮使回籍崇禎十年
流寇躡徐叅議徐標舉復領鄉營八月與賊戰被
執不屈死之標弔以詩有白刃斷喉難斷義黃沙
埋骨不埋名之句

梁弘道字廓如蕭諸生崇禎十五年袁寇圍城佐

縣令守北門城破猶手殺賊後賊來益衆遂見害
同死者有戴奮翼字雲程亦蕭諸生

邵宗元字景康碭山人由恩貢為保定府同知署
府印李自成陷燕京遣偽將趙保定射書城上誘
降宗元手裂之時督師李建泰陰懷異志叩關入
召衆議事欲得宗元印印文書降賊宗元不與面
數其負國喪心罪建泰遂夜縋其私人出約降明
日城陷宗元被執不屈握印而死

吳汝琦徐州人明季備兵歸德與守道蔡鳳同死
滕九萇徐州人以順天京衛經歷家居明末流寇
擾徐被執罵賊為所殺

王明德字鵠儒徐州人明季為太平訓導亂兵入
城從容偕其妻赴泮水死

王養心徐州諸生甲申三月養心聞變痛哭絕粒
七日不死乃闔戶自經

王台輔字贊化邳州衛太學生明末草疏欲諫內

臣出鎮事甫入都遇國變痛哭南還後自縊死

縱四通字聞之

縱日升字天際四通子

朱道光字可大皆蕭諸生丙子之變城破俱不屈
死御史上其事從祀鄉賢

郭復性字繼善

郭復初字見心俱蕭人死難旌表

李荷春蕭人幼有文名兵至與縣令議城守跨馬

巡城堞日夜不休城破沒濠死

王道充豐諸生壬午兵變邑令委守東門城陷同
子賓死之時從知縣劉光守禦南門者有皇甫世
明字恒照亦死

國朝韓尚亮字繼川徐州人勇力善騎射明末盜起嘗
糾義勇破賊保全鄉里順治二年從下江南又從
平越閩有功委為副將燒敵桃花嶺陣襲將軍寨
擒其王九年海寇鄭成功圍漳州城內絕糧食皮

紙都盡至啖死人凡九月援兵至圍始解以堅守
功署漳鎮總兵康熙初授福建水師左路總兵三
年卒於官篋無餘金幾不能殮

呂爾占昨寧人由歲貢授蒙城訓導未及赴任順
治十年膠寇陷城爾占奮勇大呼奪刀殺賊賊怒
攢刃刺之身中數創罵不絕口而死

太倉州

宋孫察朝議大夫載從子以朝散郎使北守節不屈

裹以油絮焚之罵不絕口而死

姚舜元字景瑞嘉定人為平江府東南副將守吳
淞德祐改元冬元師下平江舜元語弟舜賓子應
龍曰國家厚澤在人大本未去收合散亡事可圖
也元師偏將東巡莫敢犯境會大霧四塞襲兵猝
至舜元與舜賓應龍皆死之

元尤鼎臣太倉州吏至正末張氏兵入吳州倅奉印
降鼎臣阻之不得為其將所繫啗以美官不屈扶

百餘終身錮之

明王燾字濬仲太倉人萬歷戊午舉人歷仕知隨州時隨為賊衝燾率民兵擊殺三百餘人賊圍城堅守二十日不下崇禎十年賊縱火焚隨南城守將遁燾知事敗冠帶自縊死

張振德字季修嘉定人以選貢知四川興文縣兼署長寧時蘭賊作亂振德日夜巡城自度形勢不能保退檢篋中得銀兩許付幼子緄曰吾不及見

汝冠矣促之行未幾賊衆薄城下振德方出戰忽
大雨城摧賊擁入振德左手持兩印右執匕首危
坐廳事妻錢氏與兩女坐後堂積薪坐側賊逼俱
投火死明日賊至火焰中見振德尸面如生兩印
在手堅不可取皆駭愕稱忠臣羅拜而去事聞贈
光祿卿謚烈愍

丘繼武字起葉嘉定人為醴陵尉陞威遠叅軍解
南糧以賊梗不得達僦民倉儲之有姦人獻米於

賊賊遣使執繼武赴營賊素知其名欲官以永州
道繼武踞牀慢罵或勸之繼武曰吾與蔡江門以
忠節相許豈忍負之遂遇害蔡江門者諱道憲長
沙理刑城陷不屈賊支解之先繼武一日云

沈雲祚字子凌太倉人明季庚辰進士知華陽縣
獻賊攻夔門雲祚見蜀王陳守禦之策不納慷慨
誓死城破被執幽於大慈寺賊黨饋食誘降雲祚
躍起罵曰吾有口食賊肉耳豈食賊粟哉遂遇害

侯峒曾字豫瞻震陽子少與弟岐曾岷曾稱江南
三鳳天啟乙丑進士歷官左通政其督學江西時
閱卷必焚香告天得人最盛分巡嘉湖定漕卒之
亂嘉邑素貧瘠每苦漕糧不給峒曾上書朝士先
得減漕後得永折皆其力焉乙酉七月從容賦詩
死於家之葉池子演潔從死

海州

宋孫傳字伯野海州人登進士中詞學兼茂科歷中

書舍人以言事貶欽宗即位拜尚書右丞俄同知樞密院以傳輔太子留守太子北去傳曰吾為太子傳當同生死子來省叱之去遂死於北紹興中謚忠定

明何洲海州人與中書舍人宋和郭節友善同仕建文朝素以忠義相勗靖難後遂相約棄官變姓名走異域賣卜自給

王振贛榆人為福建惠安巡檢捕賊被殺其子冒

矢石救父亦被害有司具奏詔廕子入監以表其忠孝

王俊字華陽贛榆人由歲貢授新蔡教諭崇禎十五年閩寇破縣俊坐明倫堂手劍叱賊賊挾俊目斷其手至死不屈

劉文炳海州人光宗后兄子封新樂侯崇禎甲申三月閩賊陷京城母杜氏繫絛帶樓上作十數縵命家僮貯薪樓下并召已嫁二女歸同死賊至俱

投繯令家人於樓下舉火文炳自外入遂與叔繼
祖及弟文耀俱投井死劉氏闔門死難者四十二
人

通州

宋孫益泰興人紹定中李全犯揚州縣令募益率衆
力拒衆且却益厲聲曰何以見令君遂身先赴敵
死贈保義郎同時顧緒顧珣俱戰死

明朱顯忠如皋人從傅友德征蜀克文州令留守番

寇數萬來攻力戰却之詰旦圍益急顯忠悉出兵
開東門拒戰被傷力不支城破為亂兵所殺

茅誦字大方泰興人洪武間以學官召對累官副
都御史靖難兵起駙馬梅殷統兵守淮南誦貽詩
勸殷辭意激烈永樂初逮赴京師不屈死妻子二
孫俱死獄中

周臣字元弼通州人進士授刑部主事大臣子坐
姦淫臣正其罪左遷薊州同知復軍屯田之沒於

豪家者以贊畫軍務功陞順天推官逆瑾黨惟罪窮治不少貸瑾誣之下獄無所坐止罰俸有投匿名疏瑾罪惡者瑾大怒矯旨責五品以下廷跪署日中遂以死

曹頂通州人有膂力嘉靖中倭寇擾南畿應募為兵大敗賊於江中復來寇通頂率水兵壁於城外疊出撓賊賊畏之引去以功當為頭領官辭不受倭又由掘巷犯通頂與戰於城北殺賊八人天雨

泥淖追賊墮塹中賊大至攢槊而殺之

徐可行字爾思通州人以太學生授長興主簿有
土賊作亂突於元旦入縣堂執知縣石有恒逼獻
帑金可行聞變亟挺劍與賊鬪賊挺刃交下竟先
令而死罵不絕口事聞贈通判賜專祠

許直字若魯如皋人明季甲戌進士知義烏縣有
清操歷文選員外李自成破京城令百官報名直
曰有一死而已乃作家書寄父賦絕命詩六章投

環死

國朝賜諡曰忠愍族子德溥字元博聞京師陷慟哭累

日

殺尚聲字黃鍾通州人為桂陽州判有郝成忠者
闖賊之梟將也闖既死獨郝一軍猶壯流駐桂陽
民與賊鬩遂圍城城破尚聲死之男婦從死者六
人

國朝吳應昌字德符通州人也以武解元登順治壬辰

進士授彭城衛守備陞浦口都司己亥六月海寇
入犯調防談家洲以陷陣不屈死自盡

世襲拖沙喇哈番

江南通志卷一百五十四

欽定四庫全書

江南通志卷一百五十五

人物志

忠節 三 安徽寧池太五府

安慶府

三國陳武字子烈松滋人年十八謁孫策於壽春因從渡江征討有功拜別部司馬策破劉勲多得廬江人以武為督所向無前孫權時累功進偏將軍

建安二十年從擊合肥奮命戰死權哀之自臨其
葬

宋劉源字叔清淮西野人原義兵長也今為潛山地
源性慷慨負大節咸淳中率山寨兵以保障鄉里
德祐元年范文虎以安慶降元景炎二年源與安
撫使張德興起兵倡義復司空山傅高舉兵應之
源建寨野人原相為犄角遂復黃州壽昌軍用景
炎正朔元兵攻源寨不能克遂移兵襲破司空山

寨破之源守禦三年至是德興及傅高俱死黃州
壽昌復陷元兵復困之力戰而死

元葛昂字銘德潛山人元季兵起昂募義保障鄉曲
駐兵皖山累立戰功事聞授安慶萬戶府金符千
戶後天完兵攻安慶府城陷昂死之

陳道夫懷寧人余闕守安慶得便宜辟道夫為懷
寧尹撫綏有方時敵攻城勢急闕欲自殺道夫曰
忠臣當死於敵徒死何名今力尚未窮宜與公死

守幸一戰而勝可保全江淮矣遂屢却強敵城陷
與闕同死之

明王勝桐城人喜讀書尤好兵法元末歸明累功官
右副元帥攻陳友諒取江州賜金帶良馬鄱陽之
戰謀欲火攻勝應募詐降夜縱火焚其營乘火奮
擊大破之勝死於火贈太原郡侯祀康郎山

甘霖懷寧人洪武丁邠鄉薦建文時為御史剛介
敢言靖難兵起被執不從遂求死從容受戮

方法字伯通桐城人洪武己卯鄉薦授四川都司
斷事永樂改元諸藩表賀法不署名尋詔逮諸藩
不署名者法登舟告家人曰至安慶告我次望江
瞻望再拜曰得望吾先人鄉足矣自沉於江

俞鑑字元吉桐城人以進士授職方主事英宗北
征備官隨駕郎中胡寧當行以病求代鑑慷慨許
諾或曰家遠子幼奈何鑑曰為國臣子敢計身家
尚書鄭瑄知其賢數與計事鑑曰惟力勸班師耳

竟死土木之難

周璽字天章太湖人弘治丙辰進士累官給諫劉瑾專權璽疏其擅改成命乞正典刑瑾銜之囑遷順天府丞使去言路時錦衣指揮楊玉附瑾誣璽蔑視使臣矯制下獄令玉自鞠玉杖之三十璽不少屈曰吾死不足惜令忠義畏懼可惜耳瑾聞益怒加杖之遂死於獄後瑾伏誅正德朝賜祭世宗即位復賜祭廕其子

汪鑾懷寧人正德己卯宸濠擁衆攻城北鑾遇被
執脅令諭城中出降誘以崇爵鑾至城下大呼曰
上師已破南昌賊困極將遁可堅守賊怒解其屍
賊退衆犬爭欲噉之一犬守護甚力遂不能進見
者知係鑾犬因知為鑾屍也有司狀聞詔旌其門
張澤字大被懷寧人以選貢授沅江令擢衢州別
駕出逋賦者於囹圄民感泣爭輸時督府胡宗獻
威傾兩浙其前驅求索無厭守令奉之惟謹澤縛

而杖之尋移廣安牧出冤濫五十餘人特遷雲南
僉事分巡安普時武定徭部鳳繼祖拒命奉檄督
戰賊伏起被執歸寨澤衣冠危坐賊願得手書移
軍門澤叱曰天朝大臣為賊作說客耶遂死之事
聞贈光祿少卿賜廟額忠節

左光斗字遺直桐城人萬歷丁未進士由中書授
御史議興水利北人始知藝稻光宗昇遐與楊漣
爭移宮兩人力為多朝野並稱為楊左累遷僉都

御史漣疏魏閹光斗與謀又草忠賢二十四大罪
疏未上而謀泄奪職歸羣小憾不已構汪文言獄
入光斗名逮至京師同漣拷訊死忠賢敗贈太子
少保謚忠毅

張秉文字含之桐城人淳之孫萬歷庚戌進士由
知縣歷任江楚閩粵司道在粵勦海寇李魁奇等
崇禎時仕至山東左布政使濟南圍急漚血遺書
二子有身為大臣當死封疆語拒守中箭死妻方

氏妾陳氏投水死贈太常卿

阮之鈿字實甫懷寧人以薦舉授穀城知縣未至
賊獻忠已據其城求撫總理熊文燦許之令屯牧
之鈿察其意欲積穀待時而發密報文燦勸設備
不聽獻賊果反之鈿刺血題壁曰讀盡古聖書籍
養成浩然心性今日殺身成仁不愧賢良方正遂
仰藥未絕賊索印不予遇害贈尚寶少卿

孟振邦字維新安慶衛世職乞休歸養中丞史可

法強出視衛篆擢叅將左兵陷城遂殉之月餘始得屍顏色如生

夏統春字元夫桐城人以保舉授黃陂縣丞流賊犯陂邑統春已還麻陽知縣未行乃督衆拒守親冒烽火衣不結帶凡十五晝夜賊偽解圍去越五日乘昧爽潰城統春巷戰力竭被執嘆曰惟一死報朝廷耳罵賊不屈賊支解之

吳普昭字克明桐城諸生崇禎丁丑流賊逼掠率

鄉民團聚格鬪十餘日被害妻孫氏痛夫難哭泣
三月死子先璘先璿殉之婦李氏許氏義不受辱
亦死人謂一門五義云

笠光弘字宏生桐城人端方有介節崇禎丁丑遇
流賊不屈死之

左光燦桐城諸生崇禎丁丑突遇賊被縛搜袖中
得一簿知為保障一方計憾而叱之光燦罵曰殺
即殺鼠輩更何問哉賊益怒拔舌斷足備極慘毒

知縣張和民請於御史題旌焉時同邑姚孫極王
夷吾趙之葵姚孫林陳力均死之又有左旗以庠
生殉節

汪之璞字石生潛山人明末流寇為亂衆聚保崑
崙推璞為長張獻忠環攻璞屢出奇謀多所斬獲
寨賴以全嘗上八策於撫軍黃配元元奇其才留
麾下曰吾得之璞流寇不足平也會省親歸寨遇
寇搜獲牌票脅之降大罵不屈賊支解之配元聞

之大慟給匾致祭同邑王培基字仲因為太湖縣
城守城陷被執死之又王立邦徐顯問俱守義死
戴君德太湖人通五經精歷律著有古史斷等書
行世崇禎壬午流賊陷城憤詈不屈殺之妻沈氏
同媳雷氏攜兩女孫俱赴水死同邑王鼎臣吳夢
暘雷綿祚雷延發雷膺祚阮之甫黃應龍俱守義
死

何大同字子野宿松廩生崇禎壬午流寇猝至被

執擁至寨下曰貫爾死為我呼開寨門大同不應
復擁之去復至一寨令曰前堡汝家所在故不從
今可速賺之大同曰皆戚里也肯以數百人命易
我一命乎遂遇害

張鳳翥宿松人崇禎辛未進士累官兵備副使分
守承德護顯陵單騎招安土寇值闖賊東下親自
登陴嚴守勵衆而郡屬開門迎賊鳳翥身受三刃
扶創走郢鄂募勇敢恢復竟卒於路

周日耀桐城人外兄左光斗被逮道路以目日耀獨左右檻車送之京泊左死於獄仍扶其櫬歸甲申五月聞闖賊破京師仰天大慟絕粒九日嘔血數升而卒

胡士恂懷寧人性至孝力學尤邃於易明末左兵陷城慷慨罵賊以死妻張氏亦赴水死二子再寅紹虞俱悲憤不食死紹虞妻蔣氏亦自縊殉時同邑何霖方應旂陳尚炳俱罵賊死

丘全潛山人土寇攻崑崙砦脅全使招砦中出降
全佯許之至砦門大呼固守勿降賊剗其腹而去
王九鼎字在德潛山人明季北直故城令時流寇
連陷七十餘邑故城原壘土而卑隘九鼎以忠義
獎率士民死守浹旬力不支城陷遂以身殉先是
九鼎以單騎赴任左右惟二子基泰泰踉蹌赴難
叩閭上書奉旨查覆俱稱歷任屢著惠績一死凜
烈千秋贈太僕寺少卿廕一子

江襟楚字雲渚由知縣轉瓊州別駕解組歸遇流賊被執不屈大罵截舌而死同邑劉守中亦殉節陳學良字象頤望江人以明經司鐸祁門及嶺東韶郡教歸里與弟學開隱居講道乙亥流寇遍鄉落學良與弟守歲達旦逼近賊營或勸其匿笑曰命果甌雖匿能免耶昆弟猶行交拜禮次日賊入門露刃挾之學良厲罵遂遇害時年七十八

陳貞申潛山人郡庠生少負志節有文行崇禎丁

丑為流寇所執脅之跪不屈賊曰爾為秀才可為
我供書寫貸爾死貞申厲聲曰我豈為賊役者憤
罵不已賊怒支解之同邑徐益隆吳自周王世美
俱不屈死

柴維煥字有文宿松諸生同三子避賊於陳漢山
並為賊執維煥身長大饒膂力欲強與俱不屈賊
殺其長子以脅之旋殺其次又殺其季終不屈賊
乃殺之時同邑陳昌言夏時行石思琳俱死義

孫臨字武功桐城人兵部侍郎晉之弟楊文驄招
致幕中奏為職方主事文驄殉節臨與同難

張應奎懷寧人年七十猶讀書不輟所著有大衍
圖邵子園中圖解西銘說諸書城陷不屈死

國朝汪吉字迪庵太湖縣人順治初以功授荊州遊擊
值小李等賊突犯當陽縣屬時賊多兵少吉奮勇
無前挺身血戰而死奉

旨優卹贈廕賜祭葬

韓應震字伯卿太湖人順治己丑除廣東信宜令
三年擢兵馬指揮未出廣遇賊犯信宜守將田自
強反顏從賊縛應震送賊營應震大罵不屈而死
趙煥文懷寧人以郡掾任陝西白水縣典史康熙
戊午興安賊叛令煥文招撫賊執而脅之煥文厲
罵乃拔舌刳目棄屍井中事聞

賜祭贈河南封邱縣主簿廕一子

徽州府

南北朝陳程文季字少卿靈洗子多幹畧有父風大建中從吳明徹北伐齊常為先鋒齊軍咸憚之號為程虎後隨明徹侵周戰敗不屈死於長安贈散騎常侍謚曰威悼

宋凌唐佐字公弼休寧人元符進士建炎間知南京劉豫陷南京被執唐佐密疏其虛實以蠟書告於朝事泄遂見害詔贈徽猷閣待制

曹文休寧人崇寧進士授睦州建德丞方臘之亂

死其官詔進秩與恩澤

程全字禹昌休寧人方臘盜起縣令棄印去全起義兵以軍功授承節郎苗劉之亂從劉光世勤王賊平授開州團練使後死王事贈官錄其後

曹夬黟人崇寧登第仕本州通判方臘之亂死於官

盧臣忠黟人政和進士歷官右正言後扈駕建康敵使有逼近御舟者臣叱退之失足墜水中數日

帝使沒者拯之拱立如生贈右諫議大夫

詹世勛婺源人紹興三十年以薦為舒城縣民兵
正將嘗以六十人敗金兵於拷栳原明日復悉衆
來世勛戰死

朱弁字少章婺源人建炎初為通問副使與王倫
使金通問兩宮留五載倫將歸弁曰使者以節為
信今印亦信也願留印使弁得抱以死遂懷印起
卧與俱金人迫弁仕劉豫弁曰吾恨不食其肉肯

臣之乎吾有死耳後和議成弁南歸入見便殿言
敵情秦檜惡之僅轉奉議郎

王觀國字賓老祁門人紹興十八年進士授陝州
宜興縣尉值賊起不屈被害贈官一等錄其家

程光廷字朝望休寧人嘉定進士知羅山縣趙方
辟為節制三關部軍策應歿於王事贈朝奉郎

許月卿字大空婺源人淳祐間登第時徐元杰力
攻史嵩之史陰殺之月卿率三學諸生伏闕訟寃

後又數上書斥丁賈奸邪出佐江西漕宋亡衰服
深居三年不言謝疊山嘗書其門曰要看今日謝
枋得便是當年許月卿

汪立信字誠甫婺源人淳祐進士歷知江陵府勸
賈似道盡國中兵沿江分屯置府聯絡固守否則
輸歲幣得緩師期以修守備俱不用咸淳十年似
道督師次江上以立信為招討使募兵援江上諸
郡受命即日上道與似道遇蕪湖曰某去尋一片

趙家地上死耳至高郵欲控引淮漢為後圖尋聞似道師潰乃置酒召賓佐與訣慟哭三日扼吭而卒贈少傅子麟在建康不肯從衆降走閩死

程洙休寧人淳祐進士授貴池縣主簿繼調上元盡誠撫字當代民請留不得發元兵入建康百官降附洙獨沐浴闔門縊死有南憲詩集

胡廷桂字伯詵婺源人咸淳進士授平樂尉饒守唐震素知其才辟居簽幕德祐元年元兵臨城與

震協謀捍禦城陷皆死之

夏師堯字達德休寧人咸淳進士授諫議郎嘗忤
權奸被謫後陞翰林學士承旨扈從航海元兵襲
崖州死之

江友直字德正歙人為本州教授伯顏入臨安友
直升堂痛哭不食死葬梅口人名其墓曰餓殺塚
程楚翁婺源人元兵入臨安楚翁潛謀興復事泄
被執復脫去投馬廷鸞謝枋得在閩遂入閩從之

及枋得被執北去楚翁遂死逆旅中

汪維崇字賢甫歙人妻福王與芮女授承節郎及革命不食死

元汪澤民字叔志婺源人延祐五年進士歷同知推官多異政以知州召修宋遼金三史除國子司業以禮部尚書致仕居宣州長鎗軍叛來寇城城陷被執不屈死贈官謚文節所著有巢深燕山宛陵三稿

鄭王字子美歙人至正十四年除翰林院待制浮
海徵之辭疾不起明兵至守將將要致之王曰吾
豈事二姓者具衣冠北面再拜自縊死

吳訥字克敏休寧人少能詩學兵法善騎射至正
末授建德路判官兼義兵萬戶守徽州明兵至戰
敗不屈自刎死年二十七

明程國勝休寧人元末結鄉兵保鄉里明兵下徽州
拔為總管府先鋒從征有功太祖與陳友諒戰康

郎山其將張定邊直犯太祖舟舟適膠淺國勝與
諸將駕飛舸奮擊水怒湧舟始脫而國勝等深入
敵艦力戰死之追封定安郡侯謚忠愍

汪清字侯安休寧人太祖與陳友諒戰鄱陽湖清
詐降友諒為內應夜舉火中外夾攻火中猶作戰
鬪狀遂焚死錄忠贈盱眙子祀於康郎山

黃彥清歙人建文時為國子博士以名節自勵永
樂初坐私謚建文帝被逮不屈死

程通字彥亨績溪人祖平坐法遣戍延安父以誠
省兄於廣冒瘴死通昇父柩歸葬廬墓三年赴太
學上書陳情乞祖還鄉辭極懇切太祖憐之命兵
部除其籍驛送平還庚午通舉鄉試授遼府長史
文皇將舉兵通上封事陳備燕之策及即位械至
京師死獄中

汪一中字正叔歙人嘉靖甲辰進士歷任刑部主
事改都水郎治蘆溝決堤有功擢江西副使大盜

猝起薄泰和巡檢劉芳力戰死一中祭之曰爾猶
死疆事我不滅賊何以生為遂列陣俘斬數賊明
日賊大集一中躍馬當賊鋒脅中鎗臂中刃遂與
將王應鵬俱戰死贈光祿寺卿謚忠愍

程箕字斗南績溪人明經任福安教諭嘉靖間倭
突至箕與令共守禦外援不至城陷或勸避去箕
叱曰分城以守可避死乎督戰益力被執不屈死
弟子員從死者二十二人郡上其狀褒予卹典

凌子儉字仲廣歙人萬歷戊子舉人歷戶部郎陞
曲靖知府道經貴州值安寇之變督撫留為監軍
共城守圍久糧絕至煮革以食儉書壁曰一瞑萬
世不泯九死百折不回遂歿

吳懷賢字齊仲休寧人以與纂修授中書舍人讀
楊漣劾魏忠賢疏稱快註其旁曰當如任守忠即
時安置吳昌期以劾忠賢還籍懷賢遺書稱之辭
多激烈同官傅應星忠賢甥也懷賢不加禮應星

乃以告忠賢怒坐楊左黨下獄拷之從容言曰懷
賢何人乃得與楊左同死遂斃於獄懷宗初贈工
部主事

方國儒字道醇歙人少孤事母至孝登天啟辛酉
鄉舉授保康令獻賊躡境國儒力戰七晝夜賊遁
去踰月賊擁十餘萬衆復自房山來攻外援盡絕
被執罵不絕口身中七刀死

吳賜王歙人以廕判南康勦賊遇害贈按察司僉

事

汪偉字叔度休寧人明季戊辰進士授慈溪令擢翰林檢討充東宮講官流賊陷承天荆襄偉議九江增設總督從之賊薄都城守兵乏餉偉出貲市餅餌充食及城陷妻耿氏先投繯乃書壁自經死

世祖章皇帝賜謚文毅

吳開先歙人遊澤州崇禎五年流賊躡山西監司知開先勇略署為將使擊賊賊敗去從沁水轉掠

陽城開先渡沁戰擊斬數百人砲盡無援戰死

吳可箕歛人為南京國子監生聞賊陷京師自題
詩衣襟上縊死於鷄鳴山之闕侯祠

凌駟歛人明季癸未進士以職方從督輔李建泰
出拒闖賊至保定駟獨與賊戰被創既死復甦乃
走臨清建義於齊豫間勢不可支從容自盡

康正諫字秦木祁門人明季舉人授和州學正流
寇圍城急與妻汪氏先後投池死寡媳章氏亦赴

井死贈國子監監丞

馬嘉字六禮祁門人明季舉人甲申聞闖寇之難
自縊死

國朝鄭之文字貞卿休寧人臨清籍順治己丑武進士
授紹台道守備十四年海寇犯順之文獨障危城
相持閱月食援俱絕賊斬門劫之百計誘降之文
罵不絕口遂遇害

寧國府

晉俞縱宣城人咸和初為桓彝部將蘇峻之亂彝遣縱守蘭石與峻將韓晃遇衆寡不敵左右勸其退守縱曰吾受桓侯恩厚吾之不負桓侯猶桓侯之不負國也力戰死贈興古太守

宋鮑瑑旌德人宣和中方臘寇旌德瑑糾義兵擊破之後賊張遇逼黃池瑑以禦寇功補承信郎又明年賊盧進寇涇瑑率兵力戰中流矢卒

王行之字才仲太平人為婺州士曹宣和三年方

臘黨寇婺州守臣皆遁去行之曰吾獄官分當死
職遂遇害贈通直郎

詹友端宣城人政和鄉貢建炎初上書言復仇取
中原事語甚壯後戚方圍宣城友端倡衆守禦賊
平補廸功郎紹興壬子盜發西安郡委友端攝尉
與賊力戰中流矢卒

王相如字次卿宣城人建炎初江右盜起相如為
所得州有檄招附賊令草檄以報相如叱曰吾即

死不能為賊作牒遂遇害

方致堯寧國人建炎庚戌叛將戚方寇寧國致堯
率鄉兵破之伏石嶺賊益兵至遂被執賊脅之降
罵曰吾豈從賊反耶賊殺之

趙汝彛宣城人嘉熙間判文州北兵來攻與知州
劉銳晝夜搏戰城守踰兩月援絕城陷汝彛被執
不屈賊鬻殺之

周真字子繼旌德人咸淳中奉文天祥劄授本縣

尉同邑宰守縣元兵壓境力戰死之

楊義忠字太書寧國縣吏元巴延攻寧國知縣趙與禔戰死義忠率衆城守凡六十晝夜亦死之

元王翕宣城管軍百戶至正間長槍賊攻郡城將陷翕呼弟曰我受國恩當死顧老母在汝宜出避語訖即殺妻子自刎死

張文貴宣城百戶至正十七年明兵下寧國路守將出降文貴仗節死妻妾亦自殺

梅實字仲實宣城人官集慶路照磨至正末明兵圍集慶城陷不屈闔門遇害

張國岡南陵人至正丙申趙雙刀寇南陵國岡率義兵與戰兵敗被執不屈賊斷其兩膝至死罵不絕口

明何通泰字季貞寧國人元末嘗倡鄉兵却紅巾賊後寧國既屬明而偽吳兵復攻其壘城陷自剄里人為立祠

汪文炳字炳叔洪武初為都昌知縣陳友諒擁衆來攻援絕被執賊欲官之抗詈而死

陳迪字景道宣城人洪武鄉薦召為翰林編修預修大典擢雲南布政烏蒙曲靖等煽亂擊破之建文初徵為禮部尚書靖難兵起疏陳大計與齊泰極論李景隆不可任督餉過家未嘗一入聞變赴京成祖召迪責問抗詞不屈與子鳳山丹山等同日磔死衣帶中得詩有千秋公論明於日照徹區

區不二心語懷宗末賜謚忠烈

俞逢辰字彥章宣城人有學行洪武鄉薦選充燕府伴讀建文初成祖稱病密謀靖難逢辰力諫且密告藩閫張昺謝貴曰王本無恙公等勿懈隄防及師起復泣諫誅死懷宗末賜謚忠愍

萬琛字廷獻宣城人成化舉人弘治中令瑞金適閩廣流賊大入有勸琛遁者琛斥之率民兵與戰力屈被執罵賊遇害賊退得其屍身被創十六截

指三詔贈光祿寺卿予廕

吳景字伯陽南陵人弘治進士歷官四川按察僉事守江津時播州賊逼川南御史遁去景禦賊手殺數人城陷大呼曰寧殺我毋殺百姓被執不屈死之

饒鼎字象台旌德人天啟舉人除蒲臺令城陷死之御史旌曰烈尹

朱懋華字仲弢南陵人進士授浙江定海知縣莅

政數月聞闖賊入京明社為墟乃北望遙拜自縊
於署

沈壽崇字旭海宣城人有容子以武進士歷官興
都留守闖賊入承天罵賊而死贈都督僉事

屠紹臯字士際寧國人義英孫也以恩貢授上津
知縣獻賊陷城被執不屈死

國朝李煌字仲宣宣州衛人也順治間恩貢授萊州推
官尋攝膠州鎮將海時行擁兵叛脅之不從遂見

害贈僉事

汪化鰲字魚君涇縣人由拔貢歷漢中府同知吳
逆陷漢中偪受偽職鰲撫膺痛哭自經死橐葬漢
中城南

孫斌字淑獻南陵人以武進士為福寧遊擊耿逆
反招斌斌斬其使飛報督撫請兵合討耿逆怒縛
至省斌抗詞不屈發置興化棄妻子而逃至背嶺
山追卒至梃杖交下推墮峻崖腰肋皆折丁巳春

王師下興化斌扶杖謁軍門奉

旨優叙累官夔關副將都督同知聞繼母歿求解任

詔特許之武臣丁憂之例自斌始

劉讓宣城人從征粵西以軍功授西林知縣康熙
二十年隨征貴州軍前散餉於南寧遇賊逼脅不
從被殺

池州府

唐姚顯字當晦銅陵人廣明元年黃巢陷潼關顯拒

戰死僖宗嘉其忠追爵王謚英烈立廟祀之

宋羅復字無悔銅陵人登政和二年進士第知胙城縣靖康之難兵逼城下復率縣人力禦之身被重創不去南渡後以忠節褒

程端中自河南遷池州建炎中知六安軍事北兵攻六安端中固守城破死之池州都統制程全收其骨葬於池

葉諒建德人開禧三年北兵分道南下諒集義兵

拒之中流矢卒贈武經大夫立祠所居雙溪

丁黼字文伯石埭人登淳熙十四年進士第知信
州有修城功轉運使真德秀薦之端平三年以四
川制置副使兼知成都府成都逼近敵壘城中兵
不滿七百累疏告急不報元兵圍城出戰不利或
勸其走威茂避之黼曰職在守土走將安之悉衆
出東門力戰中鎗死贈顯謨閣待制謚恭愍仍敕
建褒忠祠於其鄉

江應洪字泰之青陽人登慶元五年進士第有器識善邑宰趙方方後帥襄陽辟應洪為佐方卒攝帥事後知德安府決數十年疑獄以理劇稱擢淮東提刑兼知揚州元兵大至多方禦之力屈死華岳字子西貴池人為武學生輕財好俠開禧中韩侂胄當國岳上書極斥其罪編管建寧園土中侂胄誅放還復入武學登嘉定武科第一為殿前司官以宰相史彌遠當國鬱不得志謀去之事覺

下臨安獄獄具坐議大臣當死寧宗知岳名欲生之彌遠曰是欲殺臣者遂杖死東市

清溪二生貴池人不知其姓名德祐元年元兵破池州州倖趙昴發死之有二生撫昴發屍哭曰生為趙氏臣死為趙氏鬼何以洗此冤清溪一泓水躍入弄水亭下死

蘇劉義貴池人歷官殿帥初隸呂文德麾下及諸呂降元招之不從死崖山之難

元陶起祖銅陵人至正間聚義兵捍鄉里衆恃以安授廬江知縣判銅陵縣事遷池州同知為趙普勝叛軍所執不屈被殺

明錢清字公清青陽人倜儻好義元末兵起清糾集義旅捍衛鄉邑與趙普勝立寨相望寇來則拒退則率人力耕給食一方倚賴及將軍常遇春兵至清率衆歸命授千戶吳元年從征張士誠力戰死柯永淳貴池人父德禮元末同錢清起義兵保障

池州明初從常遇春征伐有功官千戶永淳襲職
永樂中從英國公張輔征交趾力戰死

黃觀字淵伯貴池人洪武辛未會試廷試皆第一
授翰林修撰日侍御前命編寫省貪錄撰法司榜
文歷禮部侍郎建文元年改官制為侍中及靖難
師渡淮觀奉詔徵上游諸郡兵入衛還抵安慶聞
金川門之變朝服再拜自沉於羅刹磯急湍中妻
翁氏暨二女家屬十餘人盡死

湯九州石埭人少任俠游京師尚書鄭三俊見而
器之薦授京營小職歷遊擊懷宗六年為昌平副
總兵赴河南追斬賊首混天王於馬鞍山繼復有
陽邑青店夏村橫山諸捷威名大著賊深畏之尋
赴援山西中蜚語削職俾殺賊自効九年以孤軍
由嵩縣深入賊壘窮追四十餘里沒於陣

李可受字季度青陽人自幼勵志節崇禎六年以
太學生授澄城主簿時流寇躡秦中澄城屢被攻

圍可受輒佐其令以死守八年秋賊大至或勸可
受棄城走可受曰死吾分也走將奚之城陷不屈
死

蘇瓊字青城石埭人崇禎甲戌進士授景州知州
景當畿南劇衝多大璫要職瓊每與之抗為所忌
調知瀘州時張獻忠屢犯瀘瓊堅守却之己卯冬
有監司夜過邑啟城賊乘之以入瓊督衆巷戰力
竭被執脅降不屈罵賊而死妻舒氏亦自殺婢僕

從死者七人事聞贈太僕卿

余瑀字聿高銅陵人崇禎辛巳以貢授隨州判署
州事會流寇擾楚隨為賊往來屢經之路前牧多
託故避去瑀署事才八日而賊突至破州城索印
不與且大罵遂遇害

鄭三謨字都甫建德人尚書三俊兄由舉人歷南
戶部郎盡釐度支宿弊出為高州知府連署雷瓊
廉三郡巡守道以才能稱盜劫茂名獄掠及府庫

三謨赴救為賊所害郡人三日哭爭相度材運甓立廟祀之

湯文瓊字兆鰲九州從孫性至孝父母歿廬墓盡毀授徒京師崇禎甲申三月闖寇陷城文瓊慨然語其友曰吾雖布衣獨非本朝臣子乎乃書報國二字於壁又書衣衿云位無文丞相之位心存文丞相之心投繯而絕越五日面色如生

陳公誥字大誥貴池人工文善書甲申五月聞北

都淪陷闔戶痛哭自經死

馬應魁字守卿貴池人為小將史可法拔為副總兵每戰披白甲大書盡忠報國四字於背後巷戰死

國朝曹誠青陽縣人以貢歷寧州知州勤於其職康熙三年土司昌言等作亂寇寧州誠盡力守禦城陷被殺

太平府

晉王諒字幼成丹陽人少有幹略叅王敦府事稍遷武昌太守時新昌太守梁碩專威交土敦以諒為交州刺史既到境謀誅碩不克碩率衆圍諒廣州刺史陶侃遣救未至而諒敗碩逼奪諒節諒固執不與遂斷諒右臂諒正色曰死且不畏斷臂何有憤怒而卒

樂道融丹陽人少有大志好學不倦務周人急有國士風為王敦叅軍敦以討劉隗為名遣道融召

甘卓同舉兵道融忿敦逆節說卓襲敦卓始然之
率所部致討既而復納敦和將旋軍道融晝夜泣
諫愛憤而死

南北朝齊董僧慧姑孰人慷慨有節義晉安王子懋
鎮潯陽僧慧為防閣子懋起兵赴難僧慧預其謀
及子懋遇害僧慧被執請於主帥願俟晉安斂畢
就死王元邈義而許之白明帝減死配東冶子懋
子昭基九歲以方二寸絹為書訊其消息僧慧見

書曰此郎君書也悲慟而卒

宋石天麟字文祥禹勤子元豐中以勇敢應募偕侍
禁李資由峽州入招撫溪峒諸蠻諭以禍福多迎
降者資武人以殺降激變蠻復反天麟力戰遇害
唐敏求字好古當塗人宣和六年進士調德化主
簿盜起敏求率衆捍禦力不支遂遇害事聞贈官
補其子楠將仕郎

惠直字子溫當塗人崇寧二年進士歷太常博士

建炎二年周公望使金奏辟同行及命下或勸直
辭直曰天步方艱豈臣子擇利時乎兼程而進疾
作卒高郵僧舍子貺官敷文閣直學士

孫德昭當塗人建炎中以諸王郡馬領兵禦北兵
於大儀力戰而死贈忠烈侯

張伯麟字慶符當塗人以氣豪里中每慕古人奇
節紹興初以明春秋補入太學時秦檜主和議百
僚相戒以言伯麟痛憤因題齋壁曰夫差而忘勾

踐之殺而父乎事聞檜下之獄箠楚無完膚坐以
指斥罪流吉陽軍

馬進當塗軍籍隸慈湖寨伉健沉鷲軍中憚之紹
興中軍校周青等據城叛謀屠城後毆所掠絕江
渡淮而北進陰結其儔十人挺刃雜隊伍中進突
出斫青中頰餘無繼進者遂為賊害併及妻子尋
官軍收復州城上其事贈官立廟賜額明恩

陶居仁蕪湖人以行義聞鄉里為鎮江錄事叅軍

元兵攻鎮江守臣遁統制官舉城降居仁被執逼使降居仁曰吾固知歷數已窮詎可失忠義求苟活耶遂見殺主帥義之為棺斂並使人護送還鄉溯流數百里不踰時即至人多異之為立祠

趙時賞字宗白宗室子居太平州咸淳元年進士歷知旌德縣德祐元年元兵至境拒戰有功遷直寶章閣從二王入閩文天祥開府南劍奏辟叅議軍事江西招討副使提兵復寧都時賞風神明俊

議論慷慨有策謀及空阬之潰被執不屈死

呂武太平州步卒文天祥出使應募從行偕脫鎮
江之難沿淮東走海道賴武力為多天祥開府南
劔武以功補官天祥遣往約結州縣起兵相應復
由間道會天祥於汀梅挺身捍難後死江西一軍
揮涕葬之

明王愷字用和當塗人通經史太祖建中書省用為
都事歷遷左右司郎中佐胡大海駐婺州苗軍作

亂害大海執愷欲降之愷正色曰吾守土義當死
肯從賊耶賊怒並其子行殺之追封當塗縣男

吳晟當塗人總管昇弟陳友諒陷姑孰晟為所執
不屈死昇長子興與友諒兵戰於采石死之次子
振亦沒王事

嚴德字君輔當塗人少以驍勇聞從太祖平江浙
以功累遷海寧衛指揮同知守禦杭州洪武元年
征台州賊戰歿追封天水郡公

林聰字文敏世襲建陽衛職聰立功兩廣歷擢都指揮僉事留鎮鬱林州成化三年蠻寇犯境聰提軍出禦戰歿捍塘

史記言字司直當塗人明季舉人由長沙令遷知陝州陝當賊衝記言出私財募士力戰俘斬甚多賊引去俄復乘雪夜攻城陷之執記言迫降叱曰有死知州無降知州也遂被殺贈光祿少卿

金鼎祚字爾錫當塗人崇禎八年拔貢生授廬山

令張獻忠陷蜀鼎祚闔門殉節

沈受蒲字男玉當塗庠生崇禎十一年舉賢良方

正授橫州知州以清操聞遷夔州府同知調成都

獻賊破城受蒲與弟受躬死之家口數十人俱罹

害

江南通志卷一百五十五